

**Inuusuttut angerlarsimaffiup avataanut inissinneqarsimasut 18-iniit 21-inut ukioqalersimasut paarineqarallarsinnaanissaminnut inatsimmik tunngavilikkamik neqeroorfigineqarsinnaanissaasa qulakkeerneqarnissaa siunertaralugu, meeqqanik inuusuttunillu ikiorsiisarneq pillugu Inatsisartut peqqussutaata allangortinneqarnissaanik, Naalakkersuisut peqquneqarnissaannik Inatsisartut aalajangiiffigisassaattut siunnersuut**

*(Inatsisartunut ilaasortamitt Olga P. Berthelsenimit, Inuit Ataqatigiit, saqqummiunneqartoq)*

**pillugu**

**Ilaqutariinnermut Ataatsimiititaliap**

**ISUMALIUTISSIISUTAA**

**Aalajangiiffigisassatut siunnersuutip aappassaaneerneqarnerani saqqummiunneqartoq**

Ilaqutariinnermut Ataatsimiititaliaq kingullermik suliarinninnermini ukuninnga inuttaqarpoq:

Inatsisartunut ilaasortaq Debora Kleist, Inuit Ataqatigiit  
Inatsisartunut ilaasortaq Jane Petersen, Inuit Ataqatigiit  
Inatsisartunut ilaasortaq Andreas Uldum, Demokraatit  
Inatsisartunut ilaasortaq Ruth Heilmann, Siumut  
Inatsisartunut ilaasortaq Knud Kristiansen, Atassut

Siunnersuut ulloq 29. april 2010-mi siullermeerneqarnermi kingorna Ilaqutariinnermut Ataatsimiititaliamit suliarineqartussanngorlugu innersuunneqarpoq.

### **Siunnersuut pillugu**

Inuusuttunut 18-init 21-inut ukiullinnut angerlarsimaffiup avataanut inissinneqarsimasunut isumaginninnikkut suliniutit nukittorsarneqarnissaat inatsitigullu aalajangersaaffiginissaat siunnersuuteqartup siunnersuuteqarnermini kissaatigaa. Tamanna paarineqarallarnissamut inatsimmik tunngavilikkamik neqerooruteqarnikkut pissaaq.

### **Siunnersuummik siullermeerineq**

Siunnersuummik siullermeerineq ulloq 29. april 2010-mi ingerlanneqarpoq, tassani partiit, Inatsisartunut ilaasortat Naalakkersuisullu tamarmik siunnersuummut oqaaseqaatiminnik saqqummiussinissamut periarfissinneqarlutik.

Siunnersuut siullermeerneqarami Naalakkersuisunit aammalu Inatsisartuni partiinit amerlanerussuteqartunit tapersorsorluarneqarpoq. Partiinit kisiartaalluni Siumut siunnersuummik tapersiinnigilaq. Tamatumani innersuussutigineqarluni malittarisassat atuuttut naapertorlugit meeqqanut inuusuttunullu tunngasuni paarinnikkallartarneq pillugu pikkorissartitsinerit 2010-mi aallartisarneqareernerat.

### **Ilaqutariinnermut Ataatsimiititaliap oqaaseqaatai**

Aalajangiiffigisassatut siunnersuummi naalakkersuinikkut anguniakkat Ilaqutariinnermut Ataatsimiititaliamit erseqqinnerusumik misissorneqarlutillu maleruagassanut atuuttunut sanilliunneqarput.

Inatsisartut meeqqanut inuusuttunullu peqqussutaat atuuttoq meeqqanut inuusuttunullu 18-inik ukioqalernerminni imminut oqartussaaffigilernissaat tikillugu sammitaavoq. Imminut oqartussaaffigilernerup kingorna paarinnikkallarsinnaanermik annertussusissaa erseqqinnerusumik aalajangersagaangitsumik maleruagassat atuuttut neqerooruteqarnissamut periarfissiipput.

Inatsisitigut tunngavilikkamik paarinnikkallarnissap neqeroorutigineqarnissaanut inatsisitigut periarfissaqartoq Ilaqutariinnermut Ataatsimiititaliap paasivaa. Inuusuttut 18-init 21-nut ukiullit paarineqarallarsinnaanerat **inatsisikkut piumasaqaatinngorlugu** inatsit aqqutigalugu qulakkeerneqarsinnaasoq Ilaqutariinnermut Ataatsimiititaliap erseqqissassavaa. Tamanna assersuutigalugu pisinnaavoq inuusuttut pineqartut erseqqinnerusumik annertussusilimmik siunnersorteqarnissamik imaluunniit tarnip pissusianik ilisimasalimmik ikiorserneqarnissaasa inatsisitigut piumasaqaatinngorlugu qulakkeerunnerisigut. Inatsisitigut piumasaqaatip taamaattup inatsimmut ilanngunneqarnera assersuutigalugu 1. januar 2011-mi pisussanngorlugu UKA 2010-mi ingerlanneqarsinnaavoq. Tarnilli pissusianik ilisimasalinnit sullissiviup pisariaqartinneqartup 1. januar 2011-imi piareersinnaanissaa ilimananngilaq, taamaattumillu inuiaqatigiit akissaqartitaat pisariaqartitaallu ilanngullugit siunnersuut una isumaliutigineqartariaqarpoq.

Siunnersuut inuusuttunut sanngiinnerusunut imminnullu oqartussaaffigilersunut sammitinneqarpoq. Inuusuttut taakku qanigisanit sumiginnagaaneq misigisimavaat. Inuusuttut taakku meeraanerminni sakkortuunik toqqissisimananngitsunillu misigisaqartarsimapput.

Inuusuttut taakku sannginnerusutut taasariaqarput aammalu assigiinngitsumik annertussusilimmik paarineqarallarnissamik pisariaqartitsillutik – aamma 18-inik ukioqalereernerminni.

Inuusuttut allat pisariaqartumik tapersorsorneqarnissaasa siunnersorneqarnissaasalu pingaaruteqarnera Ilaqutariinnermut Ataatsimiititaliap ilisimavaa, taamaalillutik nukissaqarlutik akuullutillu innuttaaqataanissamut kajumilersinneqaqqullugit. Taamaattumik siunnersuut una ilinniartitaanerup inuusutissarsiornerullu tungaanit aamma isiginiarneqartariaqarpoq.

Siunnersuummik oqaluserinninneq tungavigalugu meeqqanik inuusuttunillu ulloq unnuarlu angerlarsimaffinni inissinneqarsimasunik imaluunniit ilaqutariinni paarineqartunik misissuineq ingerlanneqassasoq Ilaqutariinnermut Ataatsimiititaliamit kaammattuutigineqassaaq, taamaalilluni inissiinerit siunertaq naapertorlugu ingerlasimanersut aammalu inissinneqartunut inersimasunngorneranni pitsaasumik tungavissiisimanersut pillugit paasissutissat ilisimasallu pigineqaleqqullugit. Kiisalu imminut oqartussaaffigilerup kingorna inissinneqarsimasut tapersorsorneqarnissamut paarineqarallarnissamik pisariaqartitsinerat misissorneqartariaqarpoq. Inuusuttut tapersorsorneqarnissamik qanoq pisariaqartitsinerat aammalu inissinneqarnermik kingorna qanoq naatsorsuutiginninnerat pillugit tusarniaanerit misissuinerillu aallaavigalugit suliassaqarfimmi iliuserisassat aallartinneqartariaqarput. Inatsisiliornermi akuusut toqqaannartumik akuliutsinneqarnerisigut atuisut oqartussaaqataanerannik ingerlatsineq pingaarutilittut isigineqarpoq, taamaalillunilu qulakkeerneqassalluni maleruagassaalerumaartunut annertusaaneq pisariaqartitsinernut matussusiisinaanissaat. Kattuffiit, peqatigiiffiit suliampilu ingerlatsisut susassaqartut sulinerup ingerlaqqinnerani akuutinneqassapput. Periusissamik inatsisissamilu nalunaarutigineqartutut suliaqarnissami eqeersimaartutut akuunissamut Ilaqutariinnermut Ataatsimiititaliaq piareersimavoq.

Meeqqanik inuusuttunillu paarinnikkallarsinnaanermik maleruagassanik annertusaaneq inatsisit paasissutissallu tungaanit isigalugu pisariunngilaq. Neqeroorutinilli maanna atuuttunik annertusaaneq aningaasaqarnikkut, allaffissornikkut aammalu allatigut kinguneqartussavaoq. Qularutissaanngilarli inuusuttut taamatut iliuuseqarfiginerat aningaasaliiffiginerallu ungasinnerusoq isigalugu inuiaqatigiinnut akilersinnaammat.

Meeqqanut inuusuttunullu inatsisinik nutarterinermi siunnersuutip uuma ilanngunneqarnissaa Ilaqutariinnermut Ataatsimiititaliamit taperserineqarpoq.

**Inassuteqaat**

Taama paasinnilluni aalajangiiffigisassatut siunnersuut taama iluseqartoq akuersissutigineqassasoq ataatsimiititaliap isumaqatigiittup inassutigaa.

Taama oqaaseqarluni Ilaqutariinnermut Ataatsimiititaliap siunnersuut inaarutaasumik aappassaaniigassanngortippaa.

Debora Kleist  
Siulittaasoq

Jane Petersen

Andreas Uldum

Ruth Heilmann

Knud Kristiansen